

摘藻堂四庫全書薈要

集部

欽定四庫全書薈要

集部

元詩選初集卷四

五

詳校官候選知縣臣吳嗣華



欽定四庫全書薈要卷二萬三百六十四

集部

元詩選初集卷四

長洲

顧嗣立

編

李俊民莊靖集

俊民字用章別號鶴鳴老人唐韓王元嘉之後家於澤州少通程氏之學金承安中以經義舉進士

第一應奉翰林文字未幾棄官教授南遷後隱於

嵩山元世祖在藩邸劉秉忠盛稱之以安車召見

延訪無虛日遽乞還山卒賜謚莊靜先生

集作莊靖

世



祖嘗曰朕求賢三十年惟得竇漢卿及李俊民二人澤守段正卿刻其遺集十卷長平李仲紳王特升序之謂自筮仕後冥搜隱索四十餘年雖片言隻字亦必有據劉瀛云先生詩格律清新似東坡句法竒傑似山谷集句圓轉脈絡貫穿半山老人之體也雄篇鉅章奔騰放逸昌黎公之亞也蓋為當時所推重如此先生嘗自書登科記後曰余閱承安庚申登科記三十三人革命後獨與高平趙

楠庭幹二人在一日邂逅於鄉邑哽咽道舊壬寅
五月庭幹復挈家之燕京感慨忍淚書五十六字
寄之試將小錄問同年風采依稀墮目前三十一
人今鬼錄與君雖在各華顛君還攜幼去燕然我
向荒山學種田千里莫鴻行斷處碧雲容易作愁
天是時蔡州失守已十年矣故云

毛晉卿肖山堂

悠然林下客世事頗能料閒中意自適身外名肯釣卜

居山之陽初為識者笑勢將陵岱華氣欲吞嵩少方尋
愿谷歸稍近孫臺嘯微茫數烟岫巉絕對雲嶠為我增
雙明未必在遠眺始雖如面友久得乃心照恐隨有力
去或被移文誚已見成膏肓百計莫可療一時烟霞語
慎勿駭廊廟咄哉肖山堂所以警不肖

毋應之餉黍

憶昔周室衰周人詠黍離君今餉我黍為賦黍離詩厥
初藝黍時飯牛使牛肥八月黍未獲胡人驅牛歸胡人

不滿欲我民還買犢今秋犢未大又被胡人逐胡人皆
飽肉我民食不足食不足尚可鬻子輸官粟

遊碧落

并序

壬寅重午日陪郡侯段正卿暨王用亨劉漢臣濟
之君祥仲寬姚子昂張唐臣祿卿平陽趙君玉王
潤之同行

浮雲翳炎景長夏愜幽事相陪林下友共造金碧地清
流漱寒玉老樹聳蒼翠何人開山祖妙處發天秘悠悠

歲月深剝落磨崖字
遨頭興不淺有酒留客醉
幽鳥背人飛不慣
間鼓吹抵莫出山門
溪風送歸騎

郭顯道美人圖

君不見昭陽殿裏蓬萊人
終惹漁陽胡馬塵
又不見吳宮夜夜烏棲曲
竟使姑蘇走麋鹿
移人大抵物之尤喪
亂未免天公愁
雖然丹青不解語
冷眼指作鄉溫柔
試問人間何處有畫師
恐是傾國手
却憐當日毛延壽
故

寫巫山女麤醜

杜詩誰道巫山女麤醜何得此有昭君村

宣差射虎

十月初九日

北原風勁霜草枯
草間出沒藏於菟
眈眈來此被誰驅
不防邂逅馮婦車
將軍膽氣勇有餘
手中笑撚金僕姑
等閒如射兔與狐
兩眼錯莫精光無
深山大澤失所居
或撩汝頭編汝鬚
可憐肉食無遠圖
伎倆不及黔之驢
羣鼠為耗而猫不捕

欺人鼠輩爭出頭
夜行如市晝不休
渴時欲竭滿河飲
飢後共覓太倉偷
有時憑社竊所貴
亦為忌器不忍投

某氏終貽子神禍祐甫恨不猫職修受畜於人要除害
祭有八蜡禮頗優近憐銜蟬在我側何故肉食無遠謀
眈眈雄相猛於虎不肯捕捉分人憂縱令同乳不同氣
一旦反目恩為讎君不見唐家拔宅雞犬上昇去彼鼠
獨墮天不收

唐公昉師李八百得其神丹遂舉家昇天雞犬皆去惟鼠空中自墮腸出一月三易其

腸今山下有拖腸鼠
末廣微所謂唐鼠

掃晴婦 并序

世俗為掃晴婦者蓋假變理之手導陰陽之和使

民間免乾溢之患也感其事而賦之

卷袖褰裳手持帚挂向陰空便搖手前推後却不辭勞
欲動不動誰掣肘偶人相對木與土神女但誇朝復莫
龍公不作本分事中間多少閒雲雨見說周人憂旱母
寧知東海無冤婦殷勤更倩封家姨一時斷送龍回首

姚子昂畫馬

雄姿卓立開天骨騰踏萬里如神速可憐不遇九方臯
空使時人指為鹿自從大奴守天育無由更騁追風足

中原一戰收乾坤白髮將軍髀生肉

苴屨

待詔門前東郭趾藍闕路上仙人迹雪花紛披蓋地白
東家不借借不得雖然近市屨亦無以故為新即有餘
同行留我木上座補過仰渠金十奴一生能著屨幾兩
用心猶在阮孚上不須更覓下邳侯山林此計成長往

時守
下邳

籌堂尋梅

蕭疎籬落誰家圃尋芳信逐游蜂去眼前荆棘少人行
馬蹄直到香來處怕愁貪睡獨開遲瘦損春寒鶴膝枝
可是東君苦留客斜風細雨不堪詩

綵樓并序

高平縣綵樓聞之舊矣今始親見議者猶謂高下
侈麗不及向者三分之一因感而賦之

層層華構高且崇萬綵糾結填青紅何人下手奪天巧
都入意匠經營中書契以來未省見異事驚倒百歲翁

郢斤般斧莫敢近卻立屏息慙無功寒窻夏夏鳴機婦
積年杼袖一日空山川謂可錦繡裹塵土盡皆羅綺封
前者攀轅後者挽奔車徑欲趨靈宮三年送迎禮雖舊
人事不與天時同方當炎厲行夏令權勢大抵歸祝融
神之於人無厚薄蓋以至誠能感通豚蹄豆酒道傍祝
所獲神賜亦已豐閭閻疾苦還知否我為大夫歌大東

享炎帝
閏年

上九里谷與濟之君祥仲寬李德方朱壽之姚

子昂

太行巍巍形勢尊造物設險雄中原巨靈一朝擘石裂
連峰忽斷開山門侵雲直上幾千尺挂壁一徑愁攀援
十步回頭五步坐慄慄汗出如漿翻清風掖至最高頂
下視寰海塵埃昏天壇咫尺若有待顧我不往慙食言
世間好處豈不愛脚力雖盡心長存為君試寫遠遊興
夜半月出清吟魂

與祁定之約
游天壇不果

遊濟源

并序

庚子春季與劉濟之君祥仲寬仲美姚子昂秦懿
夫馬子溫李德方深之伯英朱壽之下太行抵覃
懷望方口臨沈水二十三日丁亥郡侯段正卿因
西山鎮過回自析城來赴期值雨留宿奉仙觀翌
日己丑天霽具牲酒幣帛謁清源王廟禮畢會友
人郭伯玉李慶之王天益史德秀王輔卿紇石烈
仲傑完顏壽之方外士祁定之郭道正元明道部
將段玉等大飲於裴公亭用麾下鼓吹以樂賓薄

莫極歡而罷故賦之紀一時之勝遊也

元戎小隊閒登臨悠悠旌旆穿山林太行南下路險澀
不憚著脚窮幽尋清源祭秩世所重喬木掩映靈宮深
是時方口雨初過天風破曉開微陰入門為問廟見禮
白髮黃冠通古今且言享誠非享物那在與俗占浮沈
鞠躬執簡默有禱脯酒縱薄神所歆幾年願違莫能遂
至此始得償初心點檢圖經歎禹迹山青水綠無知音
竹根醉倒客星散夜聽波底蛟龍吟

河橋成

并序

橋成有日必有佳句寫河上逍遙之興贈子榮及
督役楊成之

預積他山木重新兩岸隄龍依天上卧虹傍水心低不假
鞭秦石何勞立蜀犀落成應有日誰向柱先題

乙未冬至

已應黃宮律初生復卦陽道隨天在北愁與日俱長節
物驚時換年光有底忙浮雲多變態試與問何祥

元夜有感

春城行欲遍百感到愁邊
市冷猶燈火人稀尚管絃
梅從今夜落柑憶舊時傳
歸去西窻月無情照不眠

遊青蓮

行處春風惡山中勝槩藏
漸佳如蔗尾薄險似羊腸
翠揖雙峰角清臨一水堂
夜長僧睡少為我話興亡

過雲中

把酒不成醉出門行路難
客愁千里破歸夢五更殘
三

仕有何喜一生常鮮歡恨無南去鴈為我報平安

宿海會寺二首

同孫講師明上人趙叔賢劉巨濟夜酌

佛堂光未放桑下喚難回是處皆堪歇何山不可開
泉因龍吐出經自兔銜來徑向黃沙過尋僧問劫灰

青山雲水窟杖錫幾時來竹待香巖擊松經道者栽
西江無水吸震旦忽花開三笑圖中友同傾破戒杯

九里谷

九曲羊腸路千層劔戟山行鈎藤蔓刺坐印石花斑樹

發三春莫雲歸萬壑間相陪林下屐雖倦不知還

獨坐

地偏無俗客日在掩柴扉暑退閒蒲扇涼生換葛衣風
高雲散影露下月揚輝獨據胡牀坐心清即道機

乙亥過河

一身長道路四海尚風塵昔作依劉客今為去魯人渡
河年在亥乞酒歲非申別後山中友相逢話又新

過星軺

古道開天險危峰拔地形連營南北戍過客短長亭野
燒驚山鬼胡雲掩將星何人弄羌管哀怨不堪聽

用趙之美留別韻四首

把酒離筵且莫辭坐中瓜葛暫相依花從識後常含笑
鳥自還時想倦飛往事微茫春夢斷故人牢落曉星稀
天涯白髮禁愁得好在西山不早歸

長短亭中送別時問君東去復何依今宵明月三人共
來日紅塵一騎飛傾蓋莫嫌相見晚斷絃惟恨賞音稀

天涯盡道還家好笑我雖歸似不歸

為君不惜送行詩但恨蕪葭失所依
流水盡朝東海去孤雲只向太行飛
仕途冰炭收心早客路參商見面稀
一曲陽關歌未徹聲聲頭上聽催歸

遙指東山去恨遲爭如蓮幕早來依
須知宋鷁猶能退有底齊禽尚不飛
洛下書生憐我少燕南壯士似君稀
主人好客厭厭醉正要髭留肯放歸

赴山陽

寄君祥濟之
仲寬子昂

立馬西風不忍行
往回只是片時程
一年又作半年客
百里有如千里情
落日寒林山下路
淡烟疎竹水邊城
願君把酒休惆悵
四海由來皆弟兄

白文舉王百一索句送行

世事紛紛亂似麻
不堪愁裏度年華
傷心城郭來家鶴
過眼光陰赴壑蛇
彈鋏歌中成老境
班荆話後各天涯
何時造物歸真宰
却覩人間第一花

承二公寵和復用元韻二首

脫却朝衫著紵麻殘年猶復夢京華世情共指鹿為馬
天意反教龍作蛇白髮不公人易老青山有素恨無涯
那禁送別東郊外滿目離離濺淚花

有客衡從說藝麻要教身後見西華若為養得能言鴨
未解除他引睡蛇歸去稍知間氣味荒唐猶種老生涯
眼前浮世憑誰問獨倚東風看落花

和東庵孔安道韻

擬結間中一草堂此心安處即吾鄉須知見在身為患

見說長生藥有方老去看書徒引睡愁來得句不成章
從前習氣都除盡待與高人論坐忘

和子榮

暫使彭宣到後堂安昌只以醉為鄉浮雲世事日千變
流水生涯天一方老子興雖如庾亮故人恩不減蘇章
能消幾兩尋山屐回首狐丘本未忘

籌堂壽日二首

此生但覺醉鄉寬

王績

誰謂螭猶北海蟠

王猛

處處相

迎皆倒屣王祭人人共喜欲彈冠王陽州應向日懸刀

夢王濬山試今朝挂笏看王子猷仙馭未來緹氏鶴月

明吹徹玉笙寒王喬

烏衣歷歷是名家人物于今比晉多俗論不侵揮塵話

王衍壯懷多付缺壺歌王大將軍雖無金埒堪調馬王

濟王賴有黃庭可換鵝王羲之見說長江欲飛渡王濬那

須冰合望滹沱王霸

用子榮河橋送別韻

河橋把酒不成歡，正是離人去住間。
公道幾時饒白髮，世情今日見青山。
娟娟明月無家對，慘慘孤雲待我還。
慙愧殷勤花裏鳥，一聲聲送出陽關。

承徐子賢賈仲常張伯英寵和復用韻

天涯杯酒強追歡，白髮光陰轉首間。
獨夜夢魂千里月，莫年心事數重山。
回腸都為愁將斷，行脚猶疑債未還。
儻得一廛休老地，柴門今後定牢關。

宿村舍四首

別後曾無一日歡風光都在落花間
眼青羞對門前柳頭白相驚雪裏山
華表鶴來猶是客烏衣燕去不知還
森森庭院荒荆棘虎豹窺人夜撼闕

握手親情有底歡疎籬茅舍兩三間
尚憐作者千年調那肯分人一半山
安得意如張翰適憑誰放取浩然還
得君斗酒須防客不怕重門更著闕

坡云重門著闕不為君政恐惡客來

仇餉

懷抱何曾得少歡春愁飛上兩眉間
一瓢謾酌獨清水

幾屐能窮無盡山見說酒兵長日備

江諮議酒猶兵也
可千日不用不可

一日不備酒可千日
不飲不可一飲不醉

未知詩債幾時還須防別後將軍

槩不待尋盟輒斬關

三兩殘杯不盡歡強陪年少貴遊間客中未必常為客

山上那堪復有山鶴髮都從愁裏變貂裘直待醉時還

一朝却入龐公市驚倒城門老抱關

坡云城門抱關
卒怪我此重游

閔董用之

怪底年來懶下帷似嫌榜尾姓名題一枝自謂烏難借

百里誰知鳳肯棲頗訝生前徒強項未應老後不然臍
試將點檢平時友大半佳城在馬蹄

亂後寄兄

萬井中原半開羊縱橫大劔與長槍晝烽夜火豈虛日
左觸右蠻皆戰場丁鶴未歸遼已冢杜鵑猶在蜀堪王
此生不識連昌樂目送孤鴻空斷腸

送趙慶之赴邠州

且莫怱怱數去程一壺別酒為君傾三年簿領妨行樂

十里溪山管送迎
湓浦蘆花風裏恨
渭城柳色雨中情
三峰無復同州看
休著新詩笑不平

和子搢來韻

新年桃李似無情
回首繁華一夢驚
點檢青氈非故物
等閒傾蓋昧平生
雨中燕子還留客
風裏楊花欲送行
試聽東流橋下水
向人時作斷腸聲

和河上修橋二首

日日相陪杖屨游
往來林下亦風流
雲間隱隱堆螺髻

雨後鱗鱗漲鴨頭休恨臨津

臨津河

經始晚且看利涉

河橋

名落成秋尋常公事閒中了詩債如何尚不酬

落魄天涯頗倦遊片帆歸去得安流幾年無事誇犀首
一旦封侯看虎頭飛將正當南渡日拾遺還是北征秋
龍鍾不稱凌烟像只有山林志可酬

壬寅九日同史正之劉濟之君祥仲寬姚子昂
東城小酌寄錦堂王君玉

興來落筆任橫斜坐上朋樽續續加貌似葉紅皆被酒

頭如雪白也簪花金風漸急秋將莫玉樹相依客盡嘉
醕酌入城扶不去臨街下馬是誰家

和子榮悼恒山韻

功名人比漢淮陰猛虎俄因犬輩擒星落旄頭兵似火
雲屯細柳士如林豈期虞虢乖脣齒謾倚良平作腹心
灑盡英雄憂國淚變風那得不傷今

恒山謂恒山公武仙其次首云唐家

外望歸藩鎮漢室中興仰羽林又剛忠公一首云斷頭那肯降朱泚血指誰思滅賀蘭皆為汴京之亂言之也

送別曹漢卿

馬上功名奈老何出門無地不風波
憑誰試著回天力有客空揮却日戈
青眼乍驚行處少赤心常笑話中多
愁人近亦無腸斷又聽離筵送別歌

莫春和端甫韻

并序

莫春索詩且以不能陪郊外之遊為恨

雨夕風朝樂事妨老來猶自為花忙
春光一歲只三月尊酒百年能幾場
辛苦衙蜂輸蜜課等閒巢燕得泥香
如何復共遨頭醉待把銀瓶指點嘗

調祁定之

風埃滿面髮蓬垂欲學喬松久遠期浮世幾場漂杵血
流年一局爛柯碁不須玉女引巢父那在神官邀退之
果待吹噓送天上人間事了未為遲

和述懷二首

簪履三千氣壓齊寒林那羨一枝棲坐中有客鵬將賦
門外何人鳳欲題酤酒未嘗防惡犬著鞭寧復待荒雞
夕陽休凭闌干望今日長安不在西

擬將齊物物難齊惟有山林跡可棲身望鳳池
慙不到名登鴈塔愧先題未能忘舊歸家鶴長是
思鳴失旦雞天為東周道垂喪肯生夫子在關西

荅子榮

行藏事拙且乘流遊徧人間老即休多汗愈膚三伏暑
漸衰潘鬢一時秋風高勢欲欺茅屋雨急聲疑在竹樓
今世宦情何處好但愁無蟹有監州

即事

鐵馬長驅汗血流眼前
戈甲幾時休誰能宰似陳平社
那免悲如宋玉秋漠漠微涼風裏
殿蕭蕭殘夜水邊樓
千村萬落荒荆棘何止山東二百州

寬張文玘

怪來久不造龍門
依舊相逢一笑溫
任把錦囊嘲李賀
休將布鼓詫王尊
事隨勢過心猶駭
言與時違舌可吞
誰為書生肯推轂
綈袍且念故人恩

讀五代史

破却千金築一臺折衝閩外望人才中原山嶽河分斷
塞上牛羊草引來西海正驚天狗墮北人忽擁帝羝回
猶憐仙掌英靈在能把潼關閉不開

索和長平諸詩友送行韻信筆奉呈君玉閨之
資客中一笑

漢厦非無論道韞自慚老去鬢皤然間愁似海藏皮裏
往事如風過耳邊幾度班荆誰與話一朝傾蓋闕相憐
柴門近日多來客火速移牀待孝先

昨晚蒙降臨無以為待早赴院謝聞已長往何
行之速也因去人寄達少慰客中未伸之志耳
書生掉舌豈其時手底青編亦倦披鐵鎖尚沈江漠漠
銅駝又沒草離離陰山路上明妃曲天寶年中杜甫詩
古往今來幾興廢白頭恨見太平遲

送郡侯段正卿北行二首

征途萬里朔風寒過盡陰山復有山歲既在於辰已後
星多客向斗牛間漫漫積雪無冬夏劫劫飛鴻自往還

若到龍庭試回首太行一片白雲間

獵獵霜風墮指寒一鞭行色抵天山馬嘶衰草孤烟外
鴈沒長空落照間入塞盡穿氊帳過去鄉須待錦衣還
功名大抵黃梁夢薄有田園便好閒

杜門

近來人事頗相乖獨坐何曾得好懷犬吠為連酤酒市
雞鳴長傍讀書齋門終待學張家塞闥恐難當噲等排
惡客就中多氣岸時時下馬繫堂階

中秋

露下天街一氣涼
月明不復被雲妨
正當金帝行秋令
疑是銀河洗夜光
鮫室影寒珠有淚
蟾宮風散桂飄香
席間醉客忙歸去
獨共三人盡此觴

代樂仲和張溫甫處督米

未必書生氣盡寒
食常不足為居閒
清於孺子滄浪水
瘦似詩人飯顆山
欲向田文彈缺去
恐因丘嫂頡羹還
聞君自有江湖量
肯為枯魚少破慳

和王季文襄陽變後二首

逐鹿中原未識真指蹤元自有謀臣虞全不念脣亡國
楚恐難當舌在人拔劍挽回牛斗氣舉鞭感起漢江塵
相逢空灑英雄淚誰是荊州一角麟

天命須分偽與真衙蜂戰蟻盡君臣蛟龍不是池中物
燕雀休嗤壘上人衣不能勝嵇紹血扇無可奈庾公塵
自從絕筆春秋後誰復傷時為泣麟

一字題示商君祥

并序

錄二十首

余年三十有九遭甲戌之變乙亥秋七月南邁時
姪謙甫主河南福昌簿迎至西山僑居廳事之東
齋小學師商君祥投詩索和頃刻間往回數十紙
謙甫曰一鼓作氣未可敵姑堅壘以待姪壻郭鴻
漸曰可以單師挫其銳乃出百字題請賦以酬之
遂信筆而書殊無意義付其徒孫男樂山示之三
日不報謙甫笑曰五言長城不復敢攻也君祥於
是攜酒來乞盟大會所友極歡而罷

雲

早魃將為虐從龍便出山人間三尺雨命駕早知還

雨

晚有來蘇意憂深望歲人一犁雖美滿猶恨不當春

塵

不憂懸榻室可奈汗人風踏破青鞵底猶疑是輭紅

春

來莫愁春遲去莫怨春忙春不隨人老誰教汝斷腸

梅

未報江南信先開雪裏村
要看花上月立馬待黃昏

松

鬱鬱愁無地青青獨有心
疑從大夫後傾蓋到如今

竹

瀟灑能醫俗擅樂看上番
我寧負此腹忍使籜龍窵

蜂

弄晴沾落絮帶雨護園花
有課常輸蜜無春不到衙

僧

貌與松俱瘦心將絮共沾
一庵空寂地香火讀楞嚴

漁

一聲歌欸乃萬頃國烟波
鼇蟹中間醉蓑衣拜浪婆

樵

雲外山將遍人間日易斜
不知棊換世柯爛未還家

硯

端溪溫潤石價重百車渠
一滴玄潭水蠅頭萬卷書

香

小炷博山鼎半殘心字灰遊蜂何處客應為百花來

隱

孔負二宜去嵇知七不堪青山休老地佳處是終南

壽

灰如戀闕心雪似窮經首問年今幾何看飲屠蘇酒

行

水笑杯猶渡山驚錫尚飛垂垂瓶鉢老何處未來歸

住

俗尚家靈運誰堪社遠公
空山雲不出愁殺渡溪風

飲

竹葉杯中醪金釵坐上春
淺斟低唱境猶道是麤人

嘯

成瑁風生坐孫登月滿臺
東臯今寂寞元亮早歸來

愁

解使回腸斷能催兩鬢秋
天涯未歸客容易上眉頭

十六日夜戲書

貪作

臧祚切

梅花夢都忘柳絮禪可憐人與月不似夜來

圓

老杜醉歸圖二首

尋常行處酒債每日江頭醉歸薄莫斜風細雨長安一
片花飛

百錢街頭酒價蹇驢醉裏風光莫傍鄭公門去恐猶恨
在登牀

卜居

東鄰西舍兩三家
簌簌牆頭落棗花
慚愧畫梁雙燕子
笑人今日又天涯

和籌堂途中即事

晚風吹雨過山堂
燈火秋涼好對牀
却被荒雞笑人懶
一聲催起著鞭忙

過雲臺

夜半風吹霽色開
曉乘殘月過雲臺
連山斷處瞰平野

一線黃流掌上來

濟源龍潭

塵世悠悠不識真一潭春碧養潛鱗
可憐無故驚雷起
誤却山前失筈人

雨後

春空靄靄莫雲低飛過山前雨一犁
明日却尋歸去路
馬蹄猶踏落花泥

阻風

東風作惡幾時休
況值春光欲盡頭
誰謂閒人無箇事
一年長是為花愁

明皇擊梧桐圖

不使梨園弟子知
太平音在鳳凰枝
一朝野鹿銜花去
長恨秋風落葉時

陽關圖

一杯送別古陽關
關外千重萬疊山
試問青青渭城柳
不知眼見幾人還

千里江山圖

筆下江山取意成一峰未盡一峰生憑誰試向行人問
水郭烟村第幾程

雪後送寶泉之碧落

酒面輕風不作寒天花散落滿人間殷勤行脚休辭遠
出得城門是雪山

和王成之梅韻

朝來一雪幕晴沙行到前村始見花驛使便將春色去

暗香今夜落誰家

下太行

山中日日伴雲間
不見閒雲只見山
君去試從山下望
青山却在白雲間

東山道中

採遍山城草木芽
百年老樹盡枯查
眼前多少閒田地
雨後春耕有幾家

太平泉

試從澗底覓根源
剔蘚剝苔得舊泉
人事盡隨流水去
幾時復見太平年

十七日送行

怱怱又別故園春
花落猶隨馬後塵
相對離筵莫惆悵
送行人是欲行人

寄別

馬蹄踏破亂山青
送客風回酒半醒
歸客莫將雲外指
大都一十五長亭

孟浩然圖

却因明主放還山
破帽騎驢骨相寒
詩句眼前吟不盡
北風吹雪滿長安

夜夢月下與數仙子酌酒仍各賦詩

天風一掃莫雲開
收拾羣仙共酒杯
但指今宵是新月
不知曾照古人來

和平太行路韻

鑿開險阻若天成
暫使時間眼界平
却羨長安西去路

青山不管送人行

和君瑞月下聞砧

夜涼枕上夢頻驚，有底秋天不肯明。
老眼近來閒淚少，那禁月下擣衣聲。

香梅二首

鄧妓之小字匠手有詩
邊仲寧索和因用其韻

被誰說破夢中梅，應有羅浮倒挂來。
祇為怕愁貪睡後，返魂纔向北枝開。

一枝瀟灑隴頭香，分付新愁竹葉觴。
紙帳不須尋短夢。

天涯倦客已無腸

魏徵

立朝讜議盡良規
誰使君王死後疑
一旦鑿輿渡遼水
即時扶起墓前碑

王庭秀悠然軒

小軒開後快雙明
峭拔南山立翠屏
好是晚來新雨過
白雲堆裏露尖青

留別

主人把酒再三留送客風高勢未休更聽愁眉歌一曲
尊前腸斷小溫柔

寒食戲書

驚見花間弄藥回同心髻縮綠雲堆多情更有牆東月
送得秋千影過來

周昉內人圖

錄四

倦繡

心情猶在未妝時却顧花間影漸移不道春來添幾線

日長只與睡相宜

擣衣

一夕秋風鴈過聲
鐵衣辛苦向邊城
將軍不用和戎計
雙杵休辭月下鳴

按樂

倚風無力見溫柔
初下喧天羯鼓樓
猶向花陰理新曲
君王不惜錦纏頭

覽鏡

不教朱粉汙天真長對菱花顧影頻但把蛾眉掃來淡
尚嫌不似虢夫人

襄陽咏史

漢高廟

在襄陽縣
西南鍾山

垓下未聞歌散楚澤中已見哭亡秦乾坤到底歸真主
愁殺鴻門碎斗人

光武廟

在襄陽東四十五里光武南陽蔡陽
人今襄陽縣是也春陵在襄陽東望

氣者蘇伯阿至南陽遙見春陵曰氣佳哉
鬱鬱蔥蔥光武始起兵還春陵望舍南火

光燭天今棗陽在
襄陽東界六十里

海內英雄待一呼
雲龍際會入東都
羯奴不識真人事
徽幸中原欲竝驅

宋玉宅

在宜城縣

離騷經裏見文章
水綠山青是楚鄉
往事一場巫峽夢
秋風搖落在東牆

關將軍廟

在襄陽南九里
鳳林關

鼎足相吞勢未分
誰能傾蓋得將軍
曹吳不是中原手

天下英雄有使君

劉表祠

祠前有墓在府城東門內

天運端能卧可收江山形勢數荆州當時若聽韓嵩策

那得曹瞞享士牛

曹操與表紹相持於官渡韓嵩說表起乘其弊表不從操征表表之子琮

竟以荆州降

鳳林

孟浩然故居在襄陽縣南十里

天寶詩人去却回果曾北闕上書來若為耆舊無新語

明主何嘗棄不才

張參議有朝宗強欲相牽率豈識先生玩世心

杜甫故里

杜易簡預之遠裔有從弟曰審言生子閑閑生甫世居襄陽甫徙家

鞏縣

不知故隱幾時離天寶年間處處詩過客不須尋世譜

萬山山下看沈碑

杜詩吾家碑不昧王氏井依然注杜預沈碑峴山之下

集古

寒食席次

鞦韆打困解羅裙把酒相看日又曛處士不知巫峽夢

春來猶見伴行雲

韓偓

韋莊

蓮花奴

韋氏子

惜花

繡軛香韉夜不歸
看花只恐看來遲
今朝幾許風吹落
多在青苔少在枝

崔塗

韓偓

楊巨源

崔櫓

春怨

已恨東風不展眉
落花惆悵滿塵衣
與君試向江邊覓
贏得淒涼索漠歸

段成式

趙渭南

東坡

吳融

贈別二首

洞庭風軟荻花秋
客散江亭雨未收
南去北來人自老

此中離恨兩難收

鄭德璘

岑參

杜牧

魏野

誰家紅袖倚江樓
白袷行人又遠遊
今夜不知何處泊

青山萬里一孤舟

杜牧

陸龜蒙

權德輿

劉長

送客之荆南

千山紅樹萬山雲
山鳥江楓得雨新
我自飄零是羈旅
不堪仍送故鄉人

韋莊

雍陶

東坡

顧非熊

聞角

鐵馬狐裘出漢營
瘴雲深處守孤城
無端遇著傷心事

鳴軋江樓角一聲

常建

劉禹錫

吳融

杜牧

春夜

春風二月落花時
憶得前年君寄詩
共道人家惆悵事
向燈彎盡一雙眉

武元衡

崔道

牛僧孺

韓偓

送客之南宮

蕭蕭風竹夜窻寒
書劍催人
不暫閒
對酒已成千里客
斷腸聲裏唱陽關

武元衡

杜巖

盧綸

李商隱

夜集

金鳳羅衣濕麝薰裝成掩泣欲行雲傍人未必知心事
一曲狂歌酒百分

韋莊

戎昱

劉阜

高駢

戲書

春風何處有佳期花滿西園月滿池料得也應憐宋玉
東鄰牆短不曾窺

武元衡

高駢

李商隱

段成

柳

還到春時別恨生渭城朝雨裊輕塵自家飛絮猶無定
不解迎人只送人

張泌

王維

羅隱

皇甫冉

醉眠

糝逕楊花鋪白氈日西鋪在古苔邊
滿山明月東風夜
留與遊人一醉眠

杜子美

王建

韓偓

鄭谷

元詩選初集卷四

欽定四庫全書蒼要卷二萬三百六十五集部

元詩選初集卷五

長洲

顧嗣立

編

劉因靜修丁亥集

因字夢吉保定容城人將生之夕其父夢神人以馬載一兒至其家曰善養之故名之曰駟字夢驥後乃改今名字焉天資絕人日記千百言六歲能詩長而深究於周程朱呂之學杜門深居不為苟合公卿使者過之避不與相見人或以為傲弗恤

也愛諸葛孔明靜以修身之語表所居曰靜修嘗

遊郎山雷溪間號雷溪真隱

又號
樵菴

至元十九年徵

拜右贊善大夫以母疾請歸二十八年召為集賢

學士固辭不起越二年卒年四十有五延祐中追

贈翰林學士容城郡公謚文靖當世廟初姚文獻

公樞許文正公衡楊文獻公果商文定公挺輩布

列臺省號稱盛治既而諸公相繼告老中朝賢士

大夫多屬意於靜修丞相布呼蜜尤力薦之卒未

竟其用許文正公之應召也道過靜修靜修謂之
曰公一聘而起母乃太速乎文正曰不如此則道
不行及靜修不就集賢之命人或問之乃曰不如
此則道不尊世祖聞之歎曰古有不召之臣其斯
人之徒歟所著有四書精要三十卷詩五卷名丁
亥集手所選定嘗自諷咏取他文焚之今所傳文
集十餘卷又續集遺詩拾遺共若干卷皆刊行於
世其論詩曰魏晉而降詩學日盛曹劉陶謝其至

者也隋唐而降詩學日變變而得正李杜韓其至
者也周宋而降詩學日弱弱而後強歐蘓黃其至
者也靜修詩才超卓多豪邁不羈之氣流派師承
於斯言見之矣

韓魏公祠

定州古北門作鎮多英竒如何郡學傍獨有韓一作魏公

碑乾坤極厚大運物物不知堂堂宋三朝翰旋公似之
惟公玄默間泰山已四維天宇公之祠元氣非公誰郡

人一何愚而於公欲私大者且勿論緒餘猶世師千年
閱古堂誰歌鄭國詩公閱古堂
富公有詩裴回老柏前目送秋鶴
飛悠悠五色雲悵望今何歸

仙臺

碣石來海際西南奄全燕中有學仙臺燕平欲昇天燕
平骨已朽遺臺猶相傳雖復生青松歲久摧為煙極目
望海波不見三山巔三山巨鼇簪山人蟻蝨然使無不
足論信有亦可憐大塊如洪鑪金石難久堅天地會有

盡何物為神仙空山無笙鶴落日下飢鳶今古非一臺
浩歎秋風前

黃金臺

燕山不改色易水無新聲誰知數尺臺中有萬古情區
區後世人猶愛黃金名黃金亦何物能為賢重輕德輝
照九仞鳳鳥才一鳴伊誰腐鼠棄坐見飢鳶爭周道日
東漸二老皆西行養民以致賢王業自此成黃金與山
平不揀兵縱橫落日下荒臺山水有餘清

馮瀛王吟詩臺

林壑少佳色風雷有清秋為問北山靈吟臺何久留時
危亦常事人生足良謀不有撥亂功當乘浮海舟飄飄
扶搖子脫屣雲臺遊每聞一朝革尚作數日愁朝廷乃
自樂山林為誰憂視彼昂昂駒奈此汎汎鷗四維既不
張三綱遂橫流坐令蚩蚩民謂茲聖與儔蚩蚩尚可恕
儒臣豈無尤不有歐馬筆孰能回萬牛太行千里來蕭
灑橫中州今朝此登臨孤懷漲巖幽何當劇疊嶂一洗

侘山羞

張燕公讀書堂

陰壁下寒泉陽崖隱深洞想像張幽州當年此絃誦遐
情納方寸灑露驚宵夢既有真積功豈無致時用不然
起絕學猶當垂後統濟濟唐開元儒臣相伯仲文雖數
燕許名不並姚宋遂令百世下煙霞抱餘痛尋幽縱步
貪懷古清歌送緬思白鹿翁眼中見連棟茲山有道氣
會遇或天縱聊以永今朝白雲不可種

龍潭

盤磴脫交蔭平壇得高岑高岑不可攀哀湍激幽音窮
源豈不得爽氣來駸駸靈潤發山骨沮洳下崖陰為問
石上苔妙理誰曾尋乾坤有乾溢此水無古今下有靈
物棲倒影毛髮森東川早連歲呼龍動雲林顧此百丈
潭豈無三日霖為霖此雖能鞭策由天心日莫碧雲合
空山深復深

經古城

金少正人卷五
卷五
我行常山尾高城下吾前按轡覽形勢依依見全燕易
水開前襟飛狐連右肩遙想豪傑場撫已增慨然薪人
過我傍一笑如相憐指城前問余考古今幾年沈思未
及荅行歌入蒼煙

孤雲

孤雲生幾時冉冉何所適豈無崑華高路遠嗟獨力徘徊
天中央明月為顏色下有幽棲士歲宴倚青壁朝飲
澗下泉莫拂松間石相對澹忘情倒影寒潭碧

晨起書事

丁丑五月
二十八日

蒼星孛明河三月麗朱方
兩月忽散落一月留中央
下有五星連西近東少張
仰面東北隅流星墜綠芒
誰令月有癭飄搖及吾憲
須臾日東生有星環四旁
一星當日中佇視搖晶光
自北忽西旋老陽已榆桑
西北雲一絲翠暈揚清芳
嫵雲生碧蘚得句聲琅琅
俄見雲有魚其大丈許長
火繩紛繞之昂然欲飛揚
呼友與共觀此境已茫茫
靈樞夢為病周官夢為祥
寤言札諸閭庸俟

知者詳

遊天城

逕遠澗隨曲崖深山漸少居然翠一城四壁立如埽天
設限仙凡雲生失昏曉平生萬事嬾登臨即輕矯山靈
知信息風煙久傾倒顧瞻困能仰汎應習稱好端居得
蕭寂遠眺礙孤峭乃知方寸間別有萬物表未須凌絕
頂曾次青已了

遊源泉

叢祠鬱蒼翠萬古藏清幽冷然石上足不逐蒼波流長
風索我御欲舉仍遲留白雲何山來相對亦悠悠

玉溪精廬

居然山四頽危檻俯晴春川氣生不極翠潤流衣巾林
陰起薄莫酒色生微醺歌聲忽落谷驚歸欲飛雲

隱仙谷

山川含太古風氣如未開中有幽棲人日莫斲蒼苔吾
胸素羲皇人世不可諧此地復何地恍若登春臺山扃

掩對峙石逕迷縈回桑麻連水竹屋宇依山崖燕南避

世謠千古知我懷橫渠百世師一區竟相乖知音得元

老龍門有遺齋

伊川先生上文潞公求龍門菴地書略曰勝善上方舊址荒廢為無用之地欲

得葺幽居其上為避暑著書之所唐王龜叔書堂於西谷松齋之名傳之至今某雖不才亦能為龍門添勝迹於後代為門下之美事

賤子孤旅人念此良悠哉於世豈有望居

山亦無媒舉杯對山靈欲去仍徘徊他年要勝跡此駕當招來

遊雲水菴

乘春奮幽潛觀化登丘山哀淙聞遠壑息駕思雲關
石窠松桂結屋珍茅管生煙紛漠漠激流散潺潺
山石浮壽色澗木榮歡顏覽物有真意撫節驚循環
悠然千載情儼若盤石間眷焉欲晤語古人何當還

泛舟西溪

萬山倒滄浪一葉凌嵯峩嵯峩為飛舞翠影如娑娑
輕陰散雨足淨綠生圓波人間碧海幻老眼青銅磨
風雲幾千古辨此雨一蓑溪南有幽人鼓櫂前山阿
煙深渺

無處月色浮松蘿

喜雨

以雨我公田
分韻得雨字

壬申秋大水一雨乃孤注九年鎔寸積曾未辨朝露陂
塘此何日還我滄洲趣夜來雲初作期待一如故既聞
漸成陣尚謂行且住甫寸驚已狂及犁歎無數平明報
三尺感激淚將雨玄功亦雄哉回旋易指顧呼酒欲鯨
吞哦詩有神助區區喜與憂豈為一飽慮

種松

萬牛來丘山大廈高崔嵬當年誰苦辛遺此千歲材手
持百松子與之俱傾頽殷勤囑造物為護荒山隈今來
見豪末喜溢蒼煙堆十年望根立百年排風雷自此千
萬年再見明堂開東家十年計戢戢千頭栽豈不早有
望求此良悠哉

玉簪

堂陰秋氣集幽花獨清新臨風玉一簪含情待何人含
情不自展未展情更真徘徊明月光泛泛如相親因之

欲有託風鬢渺冰輪

歡飲

同類天地中相親理所宜前後億萬年而我生此時前
予既不及後孰能待之同時四海內徧識將無期所識
既無幾賞心又當誰政有賞心人會遇亦復希當其會
遇時豈無事相違今朝好風色不飲君何辭

和陶

和飲酒

錄四

凝冰得火力鬱鬱陽春姿寧滅不冱寒陽火如松枝詩
家有醇醪釀此松中竒一飲盡千山枯株彼何為所以
東坡翁偃蹇不可羈

士窮失常業治生誰有道身閒心自勞齒壯髮先老客
從東方來溫言慰枯槁生事仰去聲小園分我瓜菜好指

授種藝方如獲連城寶侂年買溪田共住青林表

吾宗幾中表訪我時一致自吾居此菴才得同兩醉迷
數百年間相會能幾次每會不盡歡親情安足貴所歡

金史四庫全書
卷五
在親情杯水亦多味

器飲代窪尊巢居化安宅凡今佚樂恩孰非聖神迹况
彼耕戰徒勤力有千百乞我一身閒坐看山雲白內省
吾何功停觴時自惜

和詠貧士 錄二

陶翁本強族田園猶可依我惟一畝宅貯此明月輝翁
復隱於酒世外冥鴻飛我性如延年與衆不同歸孤危
正自念誰復慮寒飢努力歲云莫勿取賢者悲

獨正者
危至方

則礙爾實愀然中言而發違衆速尤迥風先
蹶此淵明規頽延年語也見延年誄公文

王風與連頽一輕不再軒消中正有長冬溫見瓜園人
才氣所鍾亦如焰後煙寥寥洙泗心千載誰共研龍門
有遺歌三歎誦微言意長日月短持此託後賢

桃源行

六王埽地阿房起桃源與秦分一水小國寡民君所憐
賦役多慙負天子天家正朔不得知手種桃枝辨四時
遺風百世尚不泯俗無君長人熙熙漁舟載入人間世

却悔桃花露蹤迹曾聞父老說秦強不信而今解亡國
畫圖曾識武陵溪飛鴻滅沒天之西但恨於今又千載
不聞再有漁人迷

明妃曲

初聞丹青寫明眸明妃私喜六宮羞再聞北使選絕色
六宮無慮明妃愁妾身只有愁可必萬里今從漢宮出
悔不別君未識時免使君心憐玉質君心有憂在遠方
但恨妾身是女郎飛鴻不解琵琶語祇帶離愁歸故鄉

故鄉休嗟妾薄命此身雖死君恩重來時無數後宮花
明日飄零成底用宮花無用妾如何傳去哀絃幽思多
君王要聽新聲譜為譜高皇猛士歌

塞翁行

塞翁少小壟上鋤塞翁老來能捕魚宋家昔日塞翁行
屯田校尉功不如西山瀛海接千里長城又見開長渠
要將一水限南北笑殺當年劉六符天教陂澤養鴈鶩
留與金人賦子虛我來鄉國覽風土髣髴搗鼓笛鳴鳴

胸中雲夢忽已失酒酣懷古皆平蕪昔年阻水羣盜居
塞翁子孫殺欲無至今遺老向人泣前宋監邊無遠圖

武當野老歌

南陽武當天下稀峰巒巧避山自迷青天飛鳥不可度
但見萬壑空煙霏山不知人從太古白雲飛來天作主
旌旗明滅漢陽津幾閱東西互夸闕老人住此今百年
自言三世絕人煙往事不聞宣政後初心欲返羲皇前
脯鹿為糧豹為席竹樹蒼蒼歲寒國天分地拆保無憂

怪見北風山鬼泣一聲白鴈已成擒
回望丹梯淚滿襟
傳語桃源休避世
武陵不似武當深

感秋

思古人之
不可見也

湘絃悠悠阻清音
駕車欲往洛水深
白榆一葉驚河漢
萬里碧霄中
夜心玉鸞翩翩紛翠羽
髣髴機絲隔煙霧
瓊枝難得芳華年
惟恐流光兩遲莫
河傍有星名牽牛
此星既出令人愁
明朝再見明河影
已隔人間萬古秋

飲後

日光射雨明珠璣怒氣鬱作垂天蜺天漿海波吸已竭
倒景徑入黃金卮金卮一傾天宇間天公愁吐胸中竒
海風掀舉催月出吹落酒面浮明輝瓊芝瑞露千萬斛
肝腸瀟瀟清欲飢金宮銀闕此何處夜半夢落崑崙西
眼中之人素所期赤霜為袍丹霞衣明星煌煌何太速
碧霄悵望白雲低

西山

西山龍蟠幾千里力盡西風吹不起夜來赤脚踏蒼鱗

一著神鞭上箕尾天風泠泠清入肌醉抱明月人間歸
嫦娥灑淚不敢語銀河鼓浪霑人衣寄謝君平莫饒舌
袖中此物無人知

幼安濯足圖

漢家無復雲臺功平生不識大耳公眼中天意鏡中語
此身只有扁舟東關東諸公亦英雄百年能辨山陽封
歸來老拍號秋風世事悠悠七十翁乾坤故物兩足在
霜海浮雲空復空無刀可斷華太尉有死不為丕太中

丹青白帽凜冰雪高山目送冥飛鴻為問蘇家好兄弟

萬古北海誰真龍

長公愛文舉次公愛幼
安蓋氣質各以類云

采菊圖

天門折翼不再舉袖手四海橫流前長星飲汝一杯酒
留我萬古羲皇天廟堂袞袞宋元勳爭信東籬有晉臣
南山果識悠然處不惜寒香持贈君

歸去來圖

淵明豪氣昔未除翱翔八表凌天衢歸來荒徑手自鋤

草中恐生劉寄奴中年欲與夷皓俱晚節樂地歸唐虞
平生磊磊一物無停雲懷人早所圖有酒今與龐通沽
眼中之人不可呼哀歌撫卷聲嗚嗚

雪翠軒

西山萬古青未了黛綠鬢雲已傾倒豈知太虛忽生白
恍如長夜今復曉紫陽仙翁見本根白波開天餘浩渺
胸中盤曲此高寒曾夢肝腸倚天表蒼崖飛來天出巧
為護煙嵐翠如掃萬縷寒煙吹不舉靜秀依依見娟好

此時先生一開軒平生壁立今玉峭脚底游塵輒更紅
黑頭擾擾誰為雄臨風回首三太息安得置此冰壺中
西山秀色千萬重一顧可洗浮雲空遙望飛泉駕遠壑
中有一路開雙松人間風日不到處來訪軒中雪翠翁

飲山亭雨後

山如翠浪經雨漲開軒宛一作似坐扁舟上西風為我吹

拍天要駕雲帆恣吾往太行一十年一青才遇先生醉
眼醒却笑劉伶糟麴底豈知身亦屬螟蛉

巫山圖

朔風卷地聲如雷西南想見巫山摧江南圖籍二百年
一炬盡作江陵灰不知此圖何所得眼中十二猶崔嵬
猿聲鬚鬚餘山哀行雲欲行行復回神宮縹緲望不極
乘風御氣無九垓區區雲夢蹄涔爾豈知更有陽雲臺

陳氏莊

陳氏園林千戶封晴樓水閣圍春風翠華當年此駐蹕
太平天子長楊宮浮雲南去繁華歇回首梁園亦灰滅

淵明亂後獨歸來欲傳龍山想愁絕今我獨行尋故基
前日家僮白髮垂相看不用吞聲哭試賦宗周黍離離

陳氏先父之外家也金章宗每遊獵必宿其家淵明謂先父龍山指孟嘉事

采石圖

何年鑿江倚青壁乞與中原作南北天公老眼如看畫
萬里才堪論咫尺蛾眉亭中愁欲滴曾見江南幾亡國
百年回首又戈船可憐辛苦磯頭石江頭老父說當年
夜卷長風曉無跡古人衮衮去不返江水悠悠來無極

只今莫道昔人非，未必山川似舊時。
龍蟠虎踞有時歇，月白風清無盡期。
古人看畫論兵機，我今看畫詩自竒。
平生曾有金陵夢，似記扁舟月下歸。

金太子允恭唐人馬

道人神駿心所憐，天人龍種畫亦然。
房星流光忽當眼，徑欲攬轡秋風前。
漢家金粟幾蒼煙，江都筆勢猶翩翩。
東丹獵騎自豪貴，風氣惜有遼東偏。
天人秀發長白山，畫圖省識開元年。
金源馬坊全盛日，四十萬匹如秦川。

天教劫火留此幅玉花浮動青連錢英靈無復汗石馬
悲鳴真似泣金仙只今回首望甘泉汾水繁華鴈影邊
竒探竟隨轍跡盡兀坐宛在驂騑先人間若有穆天子
我詩當作祈招篇

宋理宗書宮扇

并序

杭州宮扇二好事者得之燕市一畫雪夜泛舟一
畫二色菊理宗題其背有興盡為期及晚節寒香
之句諸公賦詩予亦同作

天津月明嗚杜鵑梁園春色凝寒煙傷心莫說靖康前
吳山又到繁華年繁華幾時春已換千秋萬古合歡扇
銅雀香銷見墨痕秋去秋來幾恩怨一聲白鴈更西風
冠蓋散為煙霧空百錢靴錦天留在禍胎要鑒驪山宮
當時夢裏金銀闕百子樓前無六月瓊枝秀發後庭春
珠簾晴卷天門雪權歌一曲白雲秋不覺金人淚暗流
乾坤幾度青城月扇影無情也解愁五雲回首燕山北
燕山雪花大如席雪花漫漫冰冱冱大風起兮柰爾何

續十二辰詩

飢鳶嚇鼠驚不起牛背高眠有如此江山虎踞千里來
才辨荊州兔穴爾魚龍入海浩無涯幻境等是杯中蛇
馬耳秋風去無跡羊腸蜀道早還家何必高門沐猴舞
豚穿雞棲皆樂土柴門狗吠報鄰翁約買神豬謝春雨

觀雷溪

飛狐天下脊老氣盤互回三江瀉天怒合為一水東南
來此勢不殺令人愁石門喜見西山開未補青天裂誰

鑿混沌胎竒聲猛狀萬萬古山根幾許猶崔嵬兩山倒
傾瀾百丈逢顛崖先聲動毛髮餘爽開襟懷初疑萬壑
轉奔石意象鬚髯坤軸摧又疑鼓角鳴地中百步未到
仍徘徊荒祠下石磴駭目何雄哉春風不到太古雪今
日乃得胸中雷穿石誰能窮窟宅流沫勢欲浮蓬萊平
生芥蒂今寒灰兩耳到骨無纖埃酈元筆頭天下水石
門之竒猶見推乃知茲遊亦竒絕快弄素電噴瓊瑰東
崖一片石坐撫

一作
拂

千年苔為招郎山君共卷長鯨杯

江妃為搗靈鼓催赤鯁躍出銀山堆先生醉來泉灑面
狂歌一和湍聲哀

遊郎山

昨日山東州馬耳索御凌風嘶今日軍市中不覺已落
山之西山之面背一無異不待風煙變化神已迷危關
度雪嶺亂石通荒蹊林間小草不識風日自太古我行
終日仰羨木杪幽禽噓但見雨色來雲物颺以淒忽然
長嘯得石頂痛快如御駿馬蹏萬里來長風五色開晴

霓長劍倚天立皎潔瑩鷓鴣平地拔起不傾側物外想
有神物提詩家舊品高少同畫圖省見巫山低誰令九
華名獨與八桂齊千態萬狀天不知敢以兩目窮端倪
騫騰誰避若飛隼側瞰何屈如怒猊千年落窮邊煙草
寒萋萋若非酈亭書生此鄉國物色誰省曾分題酈道元注
水經說郎山形勢最真今涿郡有酈亭其先世所居也乾坤至寶會有待豈有江
山如此不著幽人棲頗聞山中人雲間時聞犬與雞只
疑名山別有靈境在不許塵世窮攀躋不是先生南遊

有成約徑欲共把白雲犁九疑窺衡湘禹穴探會稽玉
井爛賞金芙蓉日觀倒卷青玻瓈風煙回首莫瀟灑南
遊準擬相招攜

掛書牛角圖

長安江都搏手空台司光祿誰雌雄大事既去乃爾耳
渠頭不斫將安容喑鳴千年楚重瞳將軍視之猶楚公
掛書牛角亦偶爾史臣比擬良未同青青澤中蒲秀色
自凌空可憐徐包徒學術皆凡庸君不見羣兒驅羊竟

何功晉陽桃李亦秋風
縱山圖畫有如此何如長作多
牛翁

清江曲

清江芙蕖玉可憐
岸花汀草自年年
來鴻去鴈不相識
曉露無聲香暗泣
江樓縹緲如花人
望之見之不可親
無限晴雲錦樹新
愁眉只向遙山顰
遙山一千里長在
愁眉底鏡裏繁華
過眼空遙山鑄向
青銅中遙山遙復
遙芙蓉霜蚤彫明
日愁眉為誰掃
月白江清天未曉

除夕

百歲三分一初心漫慨然空囊難避節青鏡不留年靜
閱無窮世閑觀已定天履端思後日四鼓未成眠

晚上易臺

遺臺連廢壘落日展遙岑海嶽天東北燕遼世古今每
當多感慨直欲罷登臨莫更留塵迹千年不易禁

登武陽

朝遊樊子館晚上武陽城潮接滄溟近山從碣石生斷

虹雲淡白返照雨疎明且莫悲吟發樵歌已愴情

鄉郡南樓懷古

南北世更迭江山人重輕澶淵出師詔顯德受降城遺
恨幾時盡寸心千載生區區蓼花詠癡計欲何成

滿城道中

學館三年夢西山此日行人生兩屐足世累一蓑輕別
澗水流合斷林煙補平誰能分半壑相與結巖耕

書堂旅夜二首

少小抱孤苦飄零重此行
迂疎從我好憂戚賴天成
夙志存無幾羈懷觸又生
寸心同弱草歲晚怯霜清
淹留已半載去住意何深
月色一千里愁人方寸秋
聲助搖落生理歎浮沈
松桂清霜滿哀歌動故林

奇邛道中

此日西塘路乘閑作勝遊
深深柳成巷脈脈稻分溝
白石長含雨黃花不受秋
移居新有意試就野人謀

城南

山人懶到骨一出動經秋欲赴城南約如營海外遊岸
容收潦盡邨色帶煙留未黍歲將晚農家猶未休

秋望

病骨秋偏蚤單衣露亦寒微雲生水際暝色起林端地
迴月遲下樓高山易殘輕風吹欲舉醉袖拂層巒

雜詩二首

何事招提好山深馬可驅松巢低映帽竹溜細通厨霜
栗千封戶雲屏四畫圖冠巾如我用白鹿起規模

水遶千山合，雲藏數畝荒。
初尋香有陣，漸入翠成行。
豚竄依危石，牛蹊帶小塘。
團茅菴如畫，可惜是逃亡。

蚤發濡上

寒出防優逸，詩情非浩然。
煙濃山失色，雲重雪連天。
坏戶仙遊上，冰髯老境前。
別家忘再宿，桑海問何年。

恒山樓

萬嶺尊恒嶽，遺臺枕後潭。
仰高慙對坐，哭險負竒探。
影落滄溟北，雲開斗柄南。
山靈憐野客，今夕費煙嵐。

登鎮州陽和門

百尺市門起重過為暫停豪分秋物色米聚趙襟形北
望雲開嶽東行氣犯星憑闌天宇在人事聽浮萍

辛巳中秋旅亭獨坐

分光陰太盛無力掩蒼溟大塊供微黑高天失舊青興
從愁外發秋向露邊零點數山河影依稀見草亭

道士孫伯英容城故居

并序

伯英名邦傑世為縣之貴族遺山元公為作墓銘

稱其遊太學所與交皆天下名士氣甚高見金世
已亂天下事無可為思得肆志方外以耗壯心而
老歲月遂為黃冠師以終葬毫之太清宮側時年
五十一因見先君子錄其家世文行之美以示鄉
人今過其居感而賦詩

政教才氣敵希夷冠帔翻然亦未宜誰辨胡寅論鴻容

見讀史
管見

只除坡老識安期

見安期
主詩

可憐喬木空秋色惟

有青山似舊時欲傳先賢問遺事故園猿鶴不勝悲

靜修

父迷字繼先好讀書明於藻鑑靜修常過方古故居謂
其人近史家所謂獨行先人嘗舉以律鄉里之貪鄙者
乃作詩云還家遊子悲千種念舊
思親淚最青亦與此詩用意相似

登雄州城樓

古戍寒雲接渺茫故鄉遊子動悲涼江山自古有佳客
煙雨為誰留太行野色分將愁外綠物華呈出夜來霜
海門何處秋聲急極目滄波空夕陽

夢先壟

望望東阡見松桂孤雲為我且踟躕十年一夢等閒過

四海此身何慮無千丈春暉空寸草萬山明月只嘯烏
舊家三逕今誰主羨殺河汾有弊廬

外家西園李花

無邊晴雪映柴扉夢裏繁華又一非人與山丘屬零落
天教草樹記芳菲每因寒節來相訪重為餘香不忍歸
里社他年有成約結菴終擬號春暉

入山

草露蛛絲晴日明亂蟲秋意有先聲屈盤未轉坡陀盡

蒼翠忽從懷抱生一徑峰回失南北兩山雲近異陰晴
天公若會登臨意可信傷心畫得成

山中月夕

滿懷幽思自蕭蕭况對空山夜正遙四壁晴秋霜著色
一天明月生潮歌傳巖谷聲豪宕酒泛星河影動搖
醉裏似聞猿鶴語百年人境有今朝

五月二十三日登城樓

獨倚危闌數鬢毛一簾輕燕晚涼高雲移山影亂初定

金
五
日
人
之
一
二
卷五
雨帶風聲來漸豪物外此天才一幕人間何事不秋毫
遠遊未盡平生興幾欲狂歌續楚騷

曉出西塘

塘水隨人緩步行哀湍激石故輕清太行穠秀霜洗淨
全趙規模天鑿成偶為登臨發悲咏忽從毛髮散秋聲
殷勤莫盡尊中酒留到青山佳處傾

南樓

登臨秋思動鄉關展盡晴波落照間歎老自非綠白髮

愛閒元不為青山幾經分合世良苦不管興亡天自閒
初擬憑闌浩歌發壯懷空與白鷗還

新晴

小雨新晴草色蘇家園生理未全疎理盆欲學魚千里
試地先栽芋一區時與老農談稼穡不因閒客罷琴書
乾坤妙處無人會卧看牆陰雀哺雛

野亭會飲

行樂人生當及辰今朝光景為誰新林陰薄薄微露日

花氣溶溶暖著人，春色十分看欲盡。
鳥聲千種聽難真，東風就手吹殘酒。
無限青山動翠鱗。

淺酌

淺酌微吟意自真，新詩改罷酒微醺。
流鶯暗逐春光老，獨鶴潛驚夜景分。
共見白駒如晚景，豈知蒼狗是浮雲。
無邊風月誰無分，只恐靈臺未屬君。

過鎮州

太行迎馬鬱蒼蒼，兩岸灘聲帶夕陽。
霜與秋容增古淡。

樹因煙景恣微茫
閱人歲月真無謂
得意江山差自強
曾記城南舊時路
十年回首儘堪傷

井陘淮陰侯廟

飢僮羸馬倦重遊
萬將分兵坐此籌
滅項豈知秦尚在
奪齊便覺漢無憂
英彭一體誰遺類
絳灌諸孫自列侯
愛殺鹿泉泉下水
亂山百折只東流

易臺

望中孤鳥入消沈
雲帶離愁結莫陰
萬國山河有燕趙

百年風氣尚遼金物華暗與秋容老杯酒不隨人意深
無限霜松動巖壑天教搖落助清吟

高亭

高亭雲錦遶清流便是吾家太一舟山影酒搖千疊翠
雨聲窻納一天秋襟懷灑落景長勝雲影空明天共遊
笑向白鷗問塵世幾人曾信有滄洲

世上

世上悠悠儘自爭眼中隱隱放教平飛蠅觸鼻人爭怒

落葉臨頭我謾驚既有陽秋暗消長何須青白太分明
疾藜原上清霜重辛苦十年跣足行

老大

老大情懷隨處樂幽閒氣味逐時添平生長物不入室
一日百錢輒下簾題品雲山寧有諱收羅風月不妨廉
客來恐說閒興廢茶罷呼棋信手拈

山石

山石那容玉獨堅人生磨滅殆天憐畫蛇最戒足無用

書馬常憂尾不全誰見虎鬚真可捋自慚雞肋豈勝拳
誤人莫向婁師德不領春生未唾前

夏日即事

迂疎爭笑近清狂多病筋骸可預防久乏園蔬因種藥
不留窻紙為抄方閒從烏雀分晴晝靜與蛭蟹共晚涼
莫道幽人好標致北窻自古有羲皇

平昔

平昔襟期鏡屢看而今涉世願高年自憐不唾青城地

共笑仍憂杞國天履影無傷猶不忍吹壘雖誤亦當然
人間萬事思空遍依舊西窓理斷編

人情

人情雲雨九疑山世路風濤八節灘共說長安如日近
豈知蜀道比天難浮航莫笑腰舟渡坎井終當繫木觀
會取登高有良法此身何地不平寬

溫公曰登高有法
徐行則不困脚踏

實地則
不危

夜雨

夢覺呼童問幾更未應先作不平鳴山深六月有秋意
夜靜滿城惟雨聲四海虛名此身媿百年浮世寸心驚
誰教簷溜如愁思欲斷還連直到明

上塚

鄉鄰見戲說兒童日日相邀社酒同故國無家仍是客
病軀未老錯呼翁里胥驗帖徵遊戶縣長聞名謁下風
欲向溪南訪喬木不禁煙雨正空濛

夏日飲山亭

借住郊園舊有緣
綠陰清晝靜中便
空釣意釣魚亦樂
高枕卧遊山自前
露引松香來酒盞
雨催花氣潤吟牋
人來每問農桑事
攷證牀頭種樹篇

春日

游絲困無力欲起重
悠颺芳草落花滿
相思春晝長

白樂天琵琶行圖

冀馬嘶寒風逐臣念鄉國
江浦聞哀絃長吟望南北

邨居雜詩四首

鄰翁走相報，隔窓呼我起。
數日不見山，今朝翠如洗。
黃昏雨氣濃，喜色滿南畝。
誰知一夜風，吹放門前柳。
獨立偶懷古，臨風還自傷。
一聲樵唱起，回首莫山蒼。
削樹題詩句，畫沙知酒籌。
他年成故事，蕭散更風流。

題山水扇

山近雨難暗，樓高秋易寒。
憑誰莫雲表，添我倚闌干。

抱陽南軒

下瞰縣崖老木稠，輕風毛髮散涼秋。
蒼苔白石夢初覺。

霽月疎雲山欲流

銅雀瓦硯

諸侯負漢已堪憐
直筆何為亦魏編
却愛曹瞞臺上瓦
至今猶屬建安年

仙人圖

千古誰傳海上山
坐令人主厭塵寰
蓬萊果有神仙在
應悔虛名落世間

春景

病餘身世淡無情但覺春來暖漸生送客出門花已謝
問知昨日是清明

今月

今月柴關幾客來擬從屐齒數莓苔求文道士花前至
載酒門生雨後回

觀梅有感

東風吹落戰塵沙夢想西湖處士家只恐江南春意減
此心元不為梅花

山家

馬蹏踏水亂明霞
醉袖迎風受落花
怪見溪童出門望
鵲聲先我到山家

溪上

坐久蒼苔如見侵
攜筇隨水就輕陰
松風自厭灘聲小
雲影旋移山色深

西郊

偶因訪客出西城
一色寒蕪滿意平
行過溪橋嘗脚力

招來野老問山名

早秋

昨朝一葉見秋生
今日千巖萬壑清
欲借西風蘇病骨
暫來石上聽松聲

春盡

草閣垂簾晝掩扉
客來知我出門稀
鳥鳴淡與人相對
花落方知春已歸

寒食道中

簪花楚楚歸寧女荷鋪紛紛上塚人萬古人心生意在
又隨桃李一番新

廢園

路傍雙石立崔嵬曾見遊人幾往來想得當年全盛日
好山橫處盡樓臺

庚辰元日

曾記西湖酒一卮乾坤和氣入新詞六年未盡冰霜怨

又到春風滿面時

乙亥所作詞有春風花柳消盡冰霜殘怨之句

下山

翠霞騰暈紫成堆
收盡雲煙酒一杯
想見浮嵐在眉宇
人人知道看山回

即事

曬罷空庭藥果收
閉門無睡却梳頭
過門幾點黃昏雨
分與蟲聲半霎秋

宋理宗南樓風月橫披二首

試聽陰山勃勃歌
朔風悲壯動山河
南樓煙月無多景

緩步微吟柰爾何

物理興衰不可常每從氣韻見文章誰知萬古中天月

只辦南樓一夜涼

理宗自題絕句其上有并作南樓一夜涼之句才到天中萬國明宋太祖

月詩也

探春

道邊殘雪護頽牆牆外柔絲露淺黃春色雖微已堪惜
輕寒休近柳梢傍


金太子允恭墨竹

手澤明昌祕閣收當年緹龍為誰留露盤流盡金人淚
應恨翔鷺不解愁

元詩選初集卷五

謹案第一頁後八行布呼蜜舊作不忽术今改後
倣此





總校官候補中書臣吳紹濬
校對官編修臣范衷
謄錄貢生臣張誠智